



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之三百十

咸豐十年庚申三月乙亥

孝賢純皇后忌辰遣官祭

裕陵○諭內閣○戶部奏閩省茶稅延不奏報請旨飭催一摺○福
建省徵收茶稅前經戶部奏准令將所繳課銀專款存儲每
屆三月奏報一次並節次隨案奏催限奏報迄今仍未據
該督撫奏報有案以致無憑查覈實屬遲延難保無侵漁中
飽情弊著慶端瑞瓚迅即遵照該部前奏速行造報毋稍徇
隱並先行查取遲延各職名送部覈辦該督撫當嚴飭各稅

員認真經理將所徵稅銀封存聽候部撥不得以辦理軍需為詞任意開銷。儻再含混宕延。即着該部查明參奏。○又諭工部奏捐修城工。覈與奏案不符。查明請旨一摺。前因甘肅捐修城工。將該督等交部議敘。免其造冊報銷。茲據工部奏稱各省捐修工程。勸辦請獎。即與動款無異。豈可漫無稽察。致滋冒濫。且此項工程銀數在五百兩以上。未據聲明保固限期。覈與該部奏案不符。所有甘肅省捐修城工一案。仍着造冊報銷。並將陝甘總督樂斌。此次議敘撤銷。毋庸交部議處。○福建水師提督楊載福奏策應江南水師。布置江面事宜。得旨。所請飭令和春抽調師船。着軍機大臣存記。遇有江

南廷寄附便諭知。○展普濟堂功德林。煮賑兩月。加賞稜米二百石。○丙子。諭內閣。前據瑞昌。羅遵殿等馳奏。皖南逆匪由廣德進竄。四安。並從武康縣直撲杭州省城。當諭令和春兼辦浙江軍務。並着候補提督總兵張玉良。總統諸軍。迅速馳往援浙。方冀大兵雲集。立解城圍。乃羅遵殿事前布置倉皇。竟墮賊計。本日據和春。何桂清等馳奏。二月二十七日。逆眾在清波門暗掘地道。將城轟塌三十餘丈。蜂擁入城。滿洲營官兵接仗殺賊。眾寡不敵。以致杭城失陷等語。覽奏焦憤。實深。和春等疊次所派援兵。為數已及萬餘。何以全未趕到。着和春。張玉良。查明各路帶兵員弁。如有託故遷延。即立予

正法現派王有齡署理浙江巡撫並著會同張玉良督飭諸軍迅圖克復其在城文武各官下落著和春何桂清王有齡迅速查明具奏○又諭和春奏營弁強姦擅殺請革職拏問等語貴州定廣協都司陳定安赴廣東招勇行至茂名縣謝雞圩地方輒敢在歇店持刀強姦民婦並將該民婦家屬及店夥等六人一併捆殺訊據供稱在歇店被竊銀兩並無殺人之事情節支離實屬目無法紀案關營員逞兇姦殺虛實均應徹底根究陳定安著即革職拏問由江蘇解赴廣東著勞崇光督同臬司歸案嚴行究辦以儆官邪○諭軍機大臣等本日據扎拉芬泰等奏接裕瑞等函稱浩罕所屬提拉依

地方有托古達買州等帶領五六百人劄住又阿克蘇所管卡拉巴哈地方住站布魯特進山勾結探聞浩罕已派倭里罕托古達買州帶兵五千於二月間前往冰嶺截官兵來路等語葉爾羌官兵毆斃浩罕額爾沁一案曾據裕瑞等奏明審結現在該浩罕派兵前來意圖報復是該大臣等前派阿奇木伯克寄信與浩罕伯克並未能折服其心辦理殊未妥協該浩罕稱兵犯順虛實雖未可知必須豫為籌辦著裕瑞等一面設法曉諭該夷俾自知理曲不致別滋事端一面不動聲色妥為防範並安撫各處回民毋令勾結為患仍隨時與扎拉芬泰會商妥辦總期消患未萌以安邊圉而弭兵端

寶鑑卷三十一
將此諭令知之。○又諭據扎拉芬泰等奏請飭催甘省欠餉等語。甘肅省欠解伊犁三成俸餉不下百萬之多。前經部議山西陝西等省報解甘餉約計三十萬兩。行令撥給伊犁。並催各該省各撥銀十數萬兩。限三日內湊齊。如數解甘。此項專撥銀兩。迄今未據甘省轉解。該將軍屢次咨催亦無回音。是否已分撥各處。抑或尚有未到。現在浩罕使臣額爾沁等在葉爾羌滋事。被弁兵毆斃。聞浩罕業已派兵欲往冰嶺阻截官兵。難保不因此起釁。南路各城設有蠢動。所需行糧一切無可支發。貽誤非輕。著林揚祖無論何款。先行籌撥銀數十萬兩。派員解赴伊犁。並查明山西等省專撥伊犁餉銀三

十萬兩。如已解到。即行起解。兼程前進。並檄飭前途臺站毋得刻延。以濟要需。將此由五百里諭令知之。○又諭和春。何桂清等。杭州毗連蘇省。為財賦之區。斷不容該逆久踞。致誤東南大局。和春現既兼辦浙江軍務。著即與張國樑。何桂清。王有齡。通盤籌畫。一面進攻杭城。一面嚴截竄路。毋令擾及附近各處。力保完善之區。並咨催前調閩兵二千。及饒廷選所部兵勇。迅速赴浙。以厚兵力。其朱興朝一軍。已到江口。即可飭令攻城。蘇州與杭州。唇齒相依。據何桂清。徐有壬奏。已募上海礮船四十隻。派員帶赴嘉興一帶。迎頭進擊。並飭蔡映斗等。嚴扼由浙入蘇之路。務即嚴密布置。毋得臨事倉皇。

江蘇藩司籌辦大營兵餉責任綦重。著何桂清、徐有壬、保奏一員先行署理。候旨簡放。所有杭州文武下落。著和春等查明具奏。再前因官軍攻克沿江賊壘。及九洲賊巢。諭令官文等飭楊載福水師與江南水師互相策應。茲據該提督奏稱。水師應仍在蕪湖以上。巡扼沿江要口。隨時截擊。俟陸兵會齊。攻復安慶後。相輔東下。僅金陵尚須礮船。請飭和春將蕪湖以上紅單師艇調往下游等語。楊載福水師既專防蕪湖以上一帶。所有紅單師艇即可調赴下游。俾呼吸相通。互為策應。著和春等體察情形酌量辦理。將此由六百里加緊各諭令知之。○又諭和春奏各路軍情緊急需用軍火浩繁。

請飭河南、山東、陝西趕解火藥足數。並請再行奏撥等語。現在江南圍攻喫緊。兼須接濟皖省江北清淮等處。近因杭湖甯國軍情同時緊急。需用孔殷。自應亟籌撥解。著慶廉、文煜、譚廷襄迅速將前次所欠該營火藥趕緊如數解足。一面再行各撥火藥十萬斤。擡槍五百桿。鳥槍一千桿。擡槍鳥槍鉛丸各三萬斤。派委妥員飛飭起解。至江南軍營以濟急需。毋稍延誤。將此由六百里各諭令知之。○欽差大臣和春奏報杭城失守情形得旨。覽奏焦憤實深。疊派援兵。有無託故遷延。著查明正法。○命欽差大臣和春兼辦浙江軍務。甘肅肅州鎮總兵官候補提督張玉良。總統援浙諸軍。專辦浙江軍

務○以江蘇布政使王有齡署浙江巡撫○丁丑
上御勤政殿聽政○詣清夏齋問

如皇貴太妃安○諭內閣和春何桂清等奏江南援兵會同杭州駐防官兵克復杭州省城一摺覽奏實深欣慰杭州省城於二月二十七日被賊攻陷杭州將軍瑞昌堅守駐防之城與賊鏖戰候補提督張玉良親督官兵星夜遄行本月初二日馳抵大關初三日早出賊不意將武林錢塘門外及昭慶寺賊壘全行掃蕩瑞昌調派八旗官兵縋城攔剿斬獲甚多張玉良挑選奮勇緣城而上瑞昌亦督隊登城援應我兵大隊一擁登城會同旗綠官兵將城隍山校場等處屯聚逆匪

斬馘殆盡遂將杭州省城克復杭州將軍瑞昌於省城被陷後尚能堅守駐防城至六日之久以待援兵會同克復厥功甚偉著賞穿黃馬褂並賞給二等輕車都尉世職候補提督張玉良出奇制勝於兩日內克復杭城實屬謀勇超羣著賞穿黃馬褂並賞給騎都尉世職署浙江巡撫王有齡密告機宜籌濟軍火糧餉不遺餘力著補授浙江巡撫迅帶兵勇馳赴浙省勦除餘匪辦理善後事宜欽差大臣江甯將軍和春兩江總督何桂清派兵援救不分畛域深堪嘉尚均著先行交部從優議敘江蘇巡撫徐有壬著交部議敘衢州鎮總兵李定太汀州鎮總兵朱興朝赴援杭州遷延不進殊堪痛恨

著即革職留營效力。仍著瑞昌等查明。如有畏葸退縮情事。即著嚴叅治罪。其在城文武官員下落。並著瑞昌。王有齡。迅速查明具奏。○諭軍機大臣等。昨據和春等奏。廣德長興。增添逆黨。若不截其來路。必至皖南之賊。麇聚於浙。雖省城已復。而到處蔓延。亦屬可慮。廣德州是否尚為賊踞。現派何員攻勦。四安為入湖州正衝。參將周天孚等。前次挫敗。恐不足恃。鄭魁士帶兵四千。由溧陽馳赴宜興。自應迅速前進。克復長興。熊天喜一軍。經王有齡商令。如杭州無須添兵。即由嘉湖間道。攻復德清。著和春即飭該提督等。探明賊蹤。奮力攻勦。不得稍涉遷延。致有貽誤。江西饒廷選一軍。本日復諭。俾

光宸。仍令其兼程赴浙。歸瑞昌。張玉良等調遣。以資攻勦。其孝豐武康之賊。亦應一律掃蕩。毋令久踞。和春距浙較遠。何桂清等與浙密邇。消息易通。正可就近策應。王有齡現授為浙江巡撫。責無旁貸。所有浙省應防應勦事宜。著即與瑞昌。張玉良。悉心籌辦。以副委任。羅遵殿等。或稱殉難陣亡。或稱救入駐防城中。詳細情形。著瑞昌。王有齡。查明具奏。臬司段光清。防守獨松關。迨武康失守。折回救援省城。何以一聞杭州被陷。即與副將王邦慶。退保海甯嘉興。顯係聞警先逃。著瑞昌等。查明嚴叅懲辦。蘇常等處防務。仍著何桂清。徐有壬。妥為布置。毋稍大意。將此由六百里加緊各諭令知之。○又

諭前有旨。令總兵饒廷選率所部兵勇星速赴援浙江。以資
攻勦。復據惲光宸奏。分兵馳援浙江。已飛飭署九江鎮總兵
文瑞。統帶兵勇二千餘名。前赴杭湖。應援等語。現經和春派
令張玉良。馳赴杭州。會同瑞昌。將入城賊匪擊退。杭州省城
尚未失守。惟城外尚有餘賊。著惲光宸即飭饒廷選。星速帶
兵。前赴杭州。協同駐守省城。統歸瑞昌張玉良調度。所有文
瑞統帶之兵。毋庸前往杭湖。著即留於江西浙江交界地方。
扼要駐劄。嚴防敗竄餘匪。擾及鄰境。以固邊圉。將此由六百
里諭令知之。○又諭。文煜奏。東省餘兵。餉米銀兩。連同前欠
請飭部覈議。准於正項內支給。覈銷一摺。山東省添募餘兵。

經軍機大臣會同戶部議覆。所需月餉。令該撫另行籌款支
給。茲據奏稱。自粵匪蔓延。額設兵丁。節次奉調外出。存營出
汛之兵。不敷分防。是以陸續添募餘兵。此時勢難裁撤。所需
口糧。無款可籌。請將每季餘兵餉米銀兩。連上年冬季欠發
之款。一併在於正項內支給。覈實造冊報銷等語。現在庫款
支絀。兵丁設有定額。豈能於正額之外。添設餘兵。東省兵丁。
雖經節次調出。而空額虛糧。積習相沿。恐復不少。著文煜嚴
飭各營。詳查缺額兵數。即將此項餘兵。照數補足。從前失察
員弁。免其置議。僅有支飾。即行嚴叅。並嚴定限期。勒令補足。
如逾限不能補足。即著該撫據實叅辦。果能於限內趕緊補

足額數。仍准其開復。如此嚴定章程。庶於兵丁不致再有缺額。餉米銀兩。亦無庸於例外開支。致形缺乏。又據奏。兵勇勦匪失利等語。據稱蘭山縣東莊寺地方。聚有六七百人身穿號衣。懸挂腰牌。賊目兼戴頂帽。經費縣知縣周鵬。會營迎勦。初次失利。旋雇募壯勇。調集鄉團。復行整隊出擊。賊即向蘭山一帶逃逸。此股匪眾。無論是否擒匪及散勇。亟應悉數殲除。勿令勾結土匪。日久擾害地方。著文煜即飭黃良楷。督同地方官。嚴扼該匪竄路。會合兜勦。務期聚而殲旃。本日據御史陳濬奏。捻蹤逼近山東。請飭江蘇山東督撫。各於本省兵勇內。籌派數千名。遴派大員。在豐碭適中之地。分立兩大營。

互相援應。遇有竄賊。即時截擊。其如何嚴密布置之處。令該督撫與督辦諸臣。悉心商辦等語。現在江南兵勇。調赴援浙。正當喫緊之際。東省防兵。除德楞額。黃良楷。郝上庠。分路防堵外。亦無餘兵可調。若令移劄豐碭之間。山東腹地。必轉致空虛。著文煜知照德楞額。並飭令黃良楷。郝上庠。各探賊蹤。遇有警報。即行督兵出境。迎頭截勦。與傅振邦互為聲援。毋得株守東境。致令匪蹤紛竄。將此由五百里諭令知之。○蠲免福建甌甯。建陽。順昌。龍巖。沙。將樂。永安。歸化。德化。甯洋。安溪。崇安。浦城。政和。松溪。長汀。甯化。清流。連城。永定。邵武。光澤。泰甯。建甯。大田。興化。莆田。仙遊。晉江。南安。惠安。龍溪。南靖。詔

安。平。和。南。平。尤。溪。武。平。永。春。三。十。九。府。州。縣。暨。汀。州。邵。武。興。化。馬。港。四。廳。溪。口。州。同。嵐。下。麻。沙。仁。壽。永。和。里。泉。上。里。羅。漢。峽。陽。縣。丞。所。屬。被。擾。地。方。新。舊。額。賦。○展。五。城。煮。賑。一。月。仍。加。賞。各。廠。米。每。日。各。一。石。○予。山。東。蘭。山。勦。匪。陣。亡。千。總。王。壽。椿。外。委。段。繼。先。祭。葬。世。職。○戊。寅。清。明。節。

上詣

安佑宮行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

幕東陵○遣官祭

孝德皇后殯宮○遣官祭

端慧皇太子園寢○諭內閣前因

朝日壇行禮。應行陪祀未到各員。當降旨令吏部等衙門查明。參奏。茲據吏部、禮部、兵部、都察院先後查明覆奏。所有單開未到各員。除另有差使及先期送冊注病各員。免其議處外。其餘陪祀無故不到及臨期告病。道阻遲延各員。均著交各該衙門照例議處。其已經陪祀漏遞職名各員。均著交各該衙門察議。是日查取職名之御史毓通、王憲成。未能查明即時參奏。著交部議處。○又諭載華等奏請飭催春季餉銀。並

懇於永濟庫暫借銀兩以資接濟一摺。

東陵兵役歲支餉銀。著准其於永濟庫租銀項下暫借一箇月錢糧。俟各州縣將本年春餉解到。即行按數扣歸原款。並著直隸總督恆福嚴飭遵化等各州縣。將本年春季兵役應支餉銀米折等項。並前欠各季劃撥錢文票銀。一併趕緊申解。近年應解兵餉。屢有拖欠。殊非慎重之道。如再任意遲延。即著嚴行參辦。並將該督藩等一併議處。○又諭恆福奏請於山海關地方試辦抽捐一摺。山海關為東三省往來要道。商賈絡繹。著照所請。即照奉天法庫門現辦章程酌量辦理。所有貨車標銀應收捐項。按照稅關日報造冊彙解。其糧食車

輒馱子等。均照所議。設立公所。並設局收捐。以免偷漏。該督即飭該管地方官。隨時體察。認真稽查。總期商賈樂從。胥吏無從滋弊。方為妥善。○又諭。羅遵殿奏。浙省仕途過雜。請嚴行舉劾。以肅官方一摺。所有該撫保舉之西防同知孫夢桃。玉環同知黃維誥。同知李壽椿。候補知縣薛時雨。廖宗元。均著送部引見。再降諭旨。其叅劾之候補知府顧準。尖巧猾利。難勝表率之任。著以通判降補。桐廬縣知縣左煊。辦事顛預。不洽輿情。著以府經歷降補。候補知縣范先疇。委靡不振。著以縣丞降補。候補同知馬桂林。嗜利營私。候補知縣楊德淵。有玷官箴。候補縣丞余廷。荼聲名狼籍。杭州府西路場鹽大

使周鼎成。黃灣場鹽大使金晉釗。公事廢弛。均著即行革職。○諭軍機大臣等。僧格林沁。恆福奏。遵旨相度地勢。妥為布置一摺。所稱北塘後路。有馬步各營。該夷不能直抄礮臺之後。辦理自必妥協。所料該夷情形。亦能洞悉。此次接收該夷。給大學士照會。業經何桂清允其轉遞。以後難以拒絕。至前諭何桂清。嘆咈二夷。應議各節。必須在上海說定。方准其照味夷之例辦理。並非令其至北塘再議也。儻該夷駛至大沽海口。不投照會。徑闖礮臺。毀我防具。該大臣等自應開礮轟擊。痛加勦洗。或該夷假投遞文書為名。仍欲拆毀防具。闖入大沽。亦不可不加懲創。若該夷投遞文書。並無桀驁情形。著

恆福派員前往接收。看其如何措詞。如已在上海議定。並未帶有兵船。即酌量允其代奏。若語言狂悖。別有要挾。即行拒絕。告以應回上海。與辦理通商之欵。差商議。此地不能接收。儻該夷恃強狂悖。即可置之不理。若仍有意尋釁。直攻礮臺。亦即督兵轟擊。如此分別辦理。不致過激。使該夷無所藉口。方為妥協。其間操縱機宜。該大臣等務須臨時斟酌辦理。若該夷已遞照會。並無悖慢之詞。又無毀防情形。該大臣等。即督兵轟擊。使該夷有所藉口。更激其決戰之心。亦必惟僧格林沁等是問。山東監生譚維清所呈地城圖說。既於海口不宜。應毋庸議。譚維清不必令其回籍。著暫留該大臣等軍營。

差委將此密諭知之。○又諭前因瑞昌等奏。請飭乍浦副都統錫齡阿。再派官兵四百名。來省助剿。當有旨。令將此項官兵。連前調之兵。共八百名。著瑞昌飛飭錫齡阿。管帶赴省。以資防勦。茲據錫齡阿奏。前調官兵四百名。已派員管帶赴省。應援。現存駐防官兵。不敷調遣等語。乍浦地方。濱臨海口。民情浮動。實係緊要之區。既據稱存兵不敷調遣。所有應行調赴應援官兵。除前次業經赴省之四百名外。其續調之官兵。四百名。著即毋庸派往。現在杭州省城。業已克復。錫齡阿亦毋庸前往。即在乍浦嚴密防範。認真巡緝。安撫居民可也。將此諭令知之。○以勦辦滇匪出力。賞都司尹士超等。花翎。餘

升敘有差。予陣亡遊擊張萬祿。祭葬世職。如總兵官例。雲騎尉馬彪。龍得雲。守備楊朝貴。吳宗漢。千總耿文廣。伍遇春。把總閔紹烈。外委董世泰等。祭葬世職。○補鑄廣西富賀營都司關防。從巡撫曹澍鍾請也。○己卯。諭內閣。前經降旨。令各省將軍督撫。毋庸來京祝嘏。茲據慶端奏。請入都隨班祝嘏。所有該督應行陛見之處。著緩至本年秋冬。察看地方情形。再行具奏。至各省將軍督撫。接奉前次諭旨。均毋庸再行奏請祝嘏。以省虛文。○諭軍機大臣等。杭州省城。現雖克復。而近城地方。賊蹤未盡。埽蕩長興等邑。城池尚為賊踞。即著和春。飭令張玉良。督飭各路援兵。克復各城。毋庸留餘孽。其廣德

一州。地關三省衝要。若不克復。則蘇杭等處。防不勝防。據和春奏。探報杭州敗匪。多赴廣德。亟應撥兵截勦。惟鄭魁士傷疾舉發。已令劉季三帶兵四千。前往宜興。為進攻長興之計。又因流洞橋為通溧陽要隘。聚賊不少。另派馮日坤。前往進勦。所籌均屬周密。惟廣德州係屬要路。尚應添兵。實力合圍。速圖恢復。毋令賊匪久踞。庶幾蘇杭得保無虞。再金陵軍營。派出援兵。為數較多。深恐逆匪乘機竄撲。仍著和春等。嚴密防勦。一俟長興等邑收復後。即可將赴援各軍。漸次撤回。將此由六百里諭令知之。○又諭。官文。胡林翼奏。分兵援應浙江一摺。據稱因接羅遵殿咨。知浙事危迫。亟謀救鄰之策。飛

撥候選知府蕭翰慶。挑選精壯衛勇三千人。並韋志俊義勇三千人。飭令蕭翰慶管帶。間道馳援浙江。如果事勢更急。再行遴員募勇備援。各等語。足見該大臣等敵愾同仇。不存畛域之見。惟浙江杭州省城。二月二十七日失陷後。旋於三月初三日。經張玉良等會同瑞昌等攻復。現在餘賊退踞廣德等處。江南各路援兵。亦已足數。勦辦楚省各軍。現當分道入皖。攻勦喫緊之時。若以得力勁軍。分撥赴浙。深恐兵力空虛。致形鬆勁。所有蕭翰慶管帶之衛勇義勇。即著仍留楚省。為入皖勦賊之用。毋庸改道赴浙。如業已啟程。並著官文等。迅速飛咨。令其折回本境。將此由六百里諭令知之。○又諭。張

芾奏。浙省軍情緊急。米興朝潰退富陽。先請交部嚴議。並請派重臣督師一摺。浙江省城。於二月二十七日。被賊用地雷轟陷。將軍瑞昌等。尚堅守駐防滿洲城待援。昨據和春等馳奏。已於三月初三日。經江南派往候補提督張玉良。會同瑞昌等。督兵克復。米興朝救援杭城。遷延不進。已將該總兵革職留營。所帶之兵。與援浙各軍。均歸張玉良總統。並諭令瑞昌等查明。如有退縮情事。即行嚴叅治罪。現在浙省敗殘餘匪。勢必各路分竄。張芾即當飛飭派往嚴州之前任杭嘉湖道孫觀。會同該地方官。鼓勵鄉團。隨地截勦。並於徽郡交界處所。派兵截擊。毋令闖入徽郡。再致蔓延。至浙省長興。武康。

孝豐。德清等縣。現皆失守。所有米興朝一軍。並江西派援之
饒廷選一軍。均須留交張玉良調遣。俟克復各縣後。再行撥
歸。將此由六百里諭令知之。○湖南巡撫駱秉章奏。審明已
革守備向東昇。前赴永州。實係請兵請餉。並無畏葸逃棄情
事。惟疏防汛地失守。應請革職。得旨。審結營弁之事。因何不
會總督銜。況南省設有提臣。巡撫不兼銜。著明白回奏。○以
河南按察使賈臻。為布政使。南汝光道邊浴禮。為按察使。○
以浙江嚴州協副將安貴。為衢州鎮總兵官。○以接遞克復
浙江省城捷報。賞奏事官員外郎福善。兵部捷報處員外郎
國英。花翎。委署主事鈺昌等。藍翎。予兵部郎中振興獎敘。○

以浙江省城被陷。旋即克復。賞副都統來存。頭品頂帶。巴圖
魯名號。○賞江南江甯投誠勇目秦禮國。石定邦等。四五品
頂帶。花翎。秦錫言等。六品頂帶。藍翎。○以援浙不力。責令已
革總兵官李定太。米興朝。戴罪自效。革副將向奎職。留營效
力。○舉行九年貴州大計。卓異官五員。罷輒官一員。年老官
一員。有疾官一員。分別議敘處分如例。○補鑄浙江巡撫關
防。兩浙鹽運使印信。○予浙江省城殉難巡撫羅遵殿。署布
政使王友端。道員繆梓。祭葬世職。○予湖南陣亡遊擊谷代
維。都司王洪貴。守備劉峻福。千總陳步方。把總黃楚漢。外委
劉時開等。七十三員。祭葬世職。○庚辰。諭內閣。胡林翼奏。臬

司審轉命案。改擬失當。請交部議處一摺。湖北民人蕭汶秀毆傷胞叔蕭旺禮身死一案。前經軍機大臣覈議駁正。所有該省承審審轉各員。應得處分。業經吏部照例議奏。茲據胡林翼奏稱。署當陽縣知縣黃鐘鳴。承審此案。以蕭汶秀並非有心干犯。依律擬罪。照例夾簽。署荊門州知州黃昌輔。武昌府知府如山。均照該縣原擬審轉。本無錯誤。前任按察使莊受祺。誤會為有心干犯。刪去聲請夾簽。實屬改擬失當。請將莊受祺。交部議處。該撫未能細心覈辦。並自請議處等語。所有此案處分。著該部另行覈議具奏。○辛巳諭內閣。和潤奏會審案件。查有弊竇。懇請另派大員查辦等語。盛京內務府

鑲黃旗驍騎校王際德等。婪贓舞弊一案。於咸豐八年九月內。有人奏參。降旨交玉明會同盛京刑部訊辦。茲據和潤奏稱。此案係將軍衙門主臺。久懸不結。既未添傳人證。又未將阻止恆謙考試一事。研究弊竇。該承審司員等。所擬奏底。有保舉王際德之詞。而於處分不肯敘入。情弊已屬顯然。解任驍騎校王際德。著即行革職。承審官協領烏爾棍珍。恩齡。佐領董廣和。員外郎悟勒德。瀆。英文。均著暫行解任。另派倭仁煜。綸。提集人證卷宗。秉公研訊確情。按律定擬具奏。務須水落石出。以成信讞。和潤即著毋庸會審。至和潤前奏。盜犯董克信等。及抱合土等兩案。亦經交玉明等查辦。何以該將

軍於年終具奏未結各案摺內將此兩案現辦情形漏未聲敘難保非該衙門承辦官員從中舞弊意存掩飾玉明有無受其蒙蔽並著倭仁煜綸詳細查明據實具奏毋稍徇隱○又諭滿慶等奏察木多兩造逞兵仇殺委員帶兵彈壓息事並現辦情形一摺工布汪曲與察木多因案控訐結連博番抗不赴傳復與察木多互相仇殺兵聯不息經滿慶等派令委員候補知縣李玉圃前往丹達帶同噶布倫宜瑪崙珠親赴兩造營盤開導該番目陽奉陰違仍於附近居夷處所焚搶博窩境內之宿木宗宇如棍噶朗三處第巴復添派番兵至巴里郎地方助工布汪曲滋事經該委員檄調碩板多工

布江達等處土兵分布要隘劉營控制隨與噶布倫帶兵赴巴里郎面諭博番頭目退兵該番目仍肆鴟張經該委員與噶布倫等派兵設伏於該番目來營要挾時將各番目立時捆縛並砍斃從番五人餘眾及被捆縛番目始悔罪乞命眾撲營之番眾亦經伏兵截回其噶朗等三處各第巴亦經該委員等豫派弁兵齎帶賞件檄諭撤兵該第巴等旋即遵檄令巴里郎番目撤兵出境各歸牧所察木多兩造番眾現已震懾兵威情願退兵歸案聽審辦理尚屬妥協所有全案人證著即派兵押赴藏中秉公審斷以昭慎重○又諭滿慶等奏喇嘛專差進貢懇請援案由四川進京一摺班禪額爾

德尼呼畢勒罕。於本年十月坐牀後。專差巴雅爾堪布。呈進丹書克貢物。具見惻忱。著准其援照成案。仍由四川進京。以示懷柔遠人至意。○以援浙不力。革協領祥瑞職。副都統錫齡阿。下部議處。○予江蘇清江浦陣亡道員吳葆晉。通判沈鴻。祭葬世職。○壬午。

上詣

安佑宮行禮。○諭內閣。前因御史恩霽奏參翰林院侍講恩吉。以漢軍旗員。蒙混改入滿洲。當經降旨。令禮兵二部。內務府。順天府。將該員戶考各冊。及箭冊中卷。一併查明具奏。嗣據禮部等衙門。查覈冊卷。先後覆奏。該員之父松齡。係在內務

府呈請改歸滿洲。由內務府行文吏戶禮等部。一體照辦。本日據內務府奏。松齡於咸豐二年六月呈稱。家譜內載始祖奇希圖。係原任三等侍衛。隸滿洲康傑達氏。與八旗氏族通譜內所載相符。是以准其更改。茲復詳查戶檔所載人名。間有不符。無憑查考。並調查官存松齡家譜。籍隸漢軍康姓。係由思謹起。並無奇希圖之名。再查八旗氏族通譜。奇希圖名下。僅有正白旗人字樣。而無包衣字樣。質之松齡。亦無實據可指。但認糊塗。願甘治罪等語。松齡身任職官。於譜系並未詳查。僅以跡涉疑似。率行呈請更改籍貫。殊屬不合。惟係業經革職之員。有無應得罪名。著該部查覈具奏。翰林院侍講

恩吉更改籍貫。雖由伊父主持。難保不因滿洲中額較寬。希圖僥倖。實屬取巧。著交部議處。所有松齡。恩吉。及同時呈改籍貫之郎中惠齡等九員。著一併改歸內務府漢軍籍貫。前任內務府堂官。並內管領等。於松齡呈改籍貫時。並未詳究原委。奏明辦理。但據松齡一面之詞。率行咨部更改。殊屬草率。著查取職名。交部議處。吏戶禮等部未經駁查。亦屬疏漏。堂司各官。並著一併查取職名。分別議處。○又諭。理藩院奏請將科爾沁扎薩克圖謝圖王旗。爭襲貝勒世爵一案。飭交盛京將軍審辦一摺。圖謝圖王旗貝勒旺楚克林沁。因病出缺無嗣。所遺世爵。據哲里木盟長卓里克圖王巴圖呈報。在

於伊弟敏珠爾色登。達木林旺濟勒二人內。指定一人承襲。該已故貝勒旺楚克林沁之母噶魯瑪。復以敏珠爾色登係屬庶出。不應襲職。赴理藩院具控。經該衙門札飭該盟長巴圖查辦。雖經取具扎薩克及近支台吉印甘各結報院。惟結內出語。仍多含糊。且未將噶魯瑪。及近族台吉等。並無爭競甘結取報。其各台吉族人結稱。達木林旺濟勒。曾給與台吉布彥德勒格爾泰養一節。該盟長亦並未能查有確據。現復據噶魯瑪以冤抑等詞。赴理藩院呈控。此案該盟長巴圖。未能詳細查究。致噶魯瑪兩次京控。著交玉明會同倭仁。提集案內應訊人證卷宗。秉公訊究。覈實辦理。以重世爵。而杜爭

端。原任貝勒旺楚克林沁之母噶魯瑪。著該衙門飭令即赴盛京聽候傳質。○禮部以宗室會試中額請得旨。取中二名。○以安徽潁州辦理招撫出力。予副都統銜烏爾棍布。以副都統用。賞知州陳之琦。參領郭明阿。都司柏雲錦。花翎。委防禦常凌等。藍翎。餘升補加銜有差。○以堵禦安徽潁上捻匪出力。開復吉林副都統麟瑞。河州鎮總兵官吉順。革職留任處分。○癸未。

上幸靜明園詣

龍神廟拈香。○諭內閣。載華等奏。職官毆斃胞姪。請革職審辦一摺。防禦富隆阿。身係職官。因胞姪巴彥布。不服教訓。輒

用木棍毆打致傷。越日身死。富隆阿著即革職。解交刑部審訊確情。按律定擬。所有巴彥布之妻關那氏。披甲德克登額。著一併解部備質。○諭軍機大臣等。袁甲三奏。請仍令穆騰阿統帶馬隊。並添調吉林黑龍江餘丁各等語。袁甲三軍營馬隊。向歸穆騰阿統帶。若遽易生手接管。深恐難資駕馭。該都統現在幫辦軍務。所有軍營馬隊。著仍由該都統管帶。以利攻勦。至吉林黑龍江馬隊。頻年徵調。為數已多。勢難再行派撥。雖添調餘丁。止三百名。而一切整裝等項銀兩。需費不貲。勝保前請。亦未允准。著毋庸議。定遠賊勢已衰。著即會同翁同書一軍。迅速進勦。毋再遲延。天長一縣。久為賊踞。揚州

寶錄卷三十一
兵力未必能遠攻。袁甲三當早籌克復。以免東竄。現在清江
竄匪一律肅清。著該大臣體察情形。分撥精兵。進規天長。迅
圖克復。惟彼處與六合相為犄角。當約會江北各軍。同時進
攻六合。以免此勦彼竄。將此由六百里諭令知之。○欽差大
臣僧格林沁等奏。通籌全局。請在各省設法勸捐。以實部庫
而裕軍儲。得旨。所請晉豫東三省勸捐。接濟京防各餉。實因
顧全大局起見。現在指撥派撥。以及藥稅加成各項京餉。奏
咨嚴催。勒限起解。何啻至再至三。該督撫等自應激發天良。
督飭藩司源源撥解。以京師為重。若再加以續捐三百萬。多
多益善。豈不更覺充裕。然各省勸捐。數載於茲。恐未必如前

踴躍。况那東補西。不過變一名目而已。著戶部認真查覈。現
在應撥京餉。已解若干。再行奏明嚴催。以期有益兵民。僧格
林沁等所請。實屬可行。惟應於此三省續捐數內。劃撥京餉
幾成。海防經費幾成。或先儘海防。有餘再行解京。一面嚴催
各項京餉。以清眉目。勿得專顧目前。致各省以勸捐為由。轉
置正撥於不問。希冀寬免嚴議。至應派道府大員。以專責成。
俟部議奏上時。再行分別寄諭。○以兵部尚書穆蔭。著步軍
統領。○修張家口駐防兵房。從都統慶昫請也。○甲申諭內
閣。前因翁心存。杜翹。再行回奏。均稱司員並未將兌換寶鈔
之事回堂。當諭載垣等。再訊忠麟。王熙震。有無質證確據。茲

據奏稱覆訊忠麟等供稱約略記得回過翁心存杜翻並無證據等語。此案以短號實鈔兌換長號實鈔其時價值雖未有低昂但係更改舊章自應回明各堂立稟辦理乃忠麟等僅稱回過翁心存杜翻其餘堂官概未回明亦未立稟存案辦理本屬錯謬何得以影響之辭意存諉過惟翁心存等在部有年即或當時疏忽何以鈔價既有低昂之後仍屬毫無覺察是忠麟等回堂一節雖無確據而該堂官於部務漫不經心實難辭咎翁心存杜翻均著先行交部議處無庸再行回奏亦無庸傳訊其餘失察之戶部各堂官著俟定案時一併查取職名交部分別議處○又諭恆福奏請將催納屯糧

暨撥運兵米辦理不善之署知縣分別議處查辦一摺直隸署龍門縣知縣盧天澤下鄉催徵屯糧如果善為開導何至鄉民聚眾抗違乃該署縣以稽查保甲將未造戶口草冊之鄉約嚴訊掌責以致該鄉民懷疑聚眾先後入城毆傷書吏閔堂拒捕實屬辦理不善盧天澤業經撤任著先行交部議處署赤城縣知縣余啟咸撥運獨石口駐防兵米雖經徧諭紳耆由官墊發運腳又傳諭改期開倉惟尚有南鄉村民聚眾抗運究屬未能整頓業經撤任著即飭令回省聽候查辦並著該督飭令口北道親提現獲各犯嚴行審訊是否刁民藉端聚眾滋鬧或書吏人等查有抑勒苛派情弊一併從嚴

懋辨以肅吏治而倣刁風○以內閣學士慶英署兵部右侍郎○以禮部尚書麟魁署鑲黃旗漢軍都統鑲白旗滿洲副都統載岱署鑲白旗護軍統領○以江南援軍克復浙江省城賞遊擊蘇如松劉登元參將張應祿守備王玉林王少卿龔占鼂巴圖魯名號把總楊昌明向玉舉五品銜花翎餘復官加銜有差

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之三百十

